

顯揚聖教論卷第四

分四

無 著 菩 薩 造

唐三藏法師玄奘奉 詔 譯

攝事品第一之四

如是已說果諸功德今當說頌曰

無量諸解脫

分四

勝處與徧處

無諍妙願智

無礙解神通

論曰無量者謂四無量廣說如經一慈無量
謂慈心俱無怨無憎無有損害廣大無量極
善修習於一方面如是次第乃至十方一切
無邊世界意解徧滿具足佳慈心俱者於無
苦無樂衆生欲施樂具阿世耶心相應故無
怨者即彼對治欲加苦具瞋故無憎者即彼
對治障礙樂具瞋故無損害者即彼對治欲
與不冱瞋故廣者於見所行作意故大者於

聞所行作意故無量者於覺知所行作意故
極善修習者由串習相應離諸蓋故於一方
面如是次第乃至十方一切無邊世界者徧
緣器世間及有情世間故意解者緣意解思
惟境界故徧滿者緣無間有情境界故具足
住者如前靜慮中說二悲無量謂悲心俱乃
至廣說悲心俱者於有苦衆生欲拔苦具阿
世耶心相應故無怨者即彼對治與苦害故
無憎者即彼對治障礙拔苦害故無損害者
即彼對治欲與不冱不喜樂害故餘如前說
三喜無量謂喜心俱乃至廣說喜心俱者於
有樂衆生隨喜彼樂阿世耶心相應故無怨
者即彼對治欲與苦具不喜樂故無憎者即
彼對治障礙樂具不喜樂故無損害者即彼
對治欲與不冱不喜樂故餘如前說四捨無

量謂捨心俱乃至廣說捨心俱者欲令不染
 阿世耶心相應故無怨者即彼對治令染貪
 瞋故無憎者即彼對治障礙除染貪瞋故無
 損害者即彼對治顛倒不染貪及瞋故餘如
 前說此四無量體性云何謂慈以無瞋善根
 為體悲以不害善根為體喜以不嫉善根為
 體捨以無貪無瞋善根為體皆是憐愍眾生
 法故於此四中慈唯無瞋次二無量無瞋一
 分捨是無貪無瞋一分又復與彼相應等持
 諸心心法并彼眷屬皆是四無量體當知先
 由增上法行善修治心復依清淨靜慮方得
 清淨無量應知諸解脫者謂八解脫廣說如
 經一有色諸色觀解脫有色者依有色定意
 解思惟故諸色者若色如勝處中廣自分別
 觀者於諸色中為變化自在故意解思惟顯

示彼相故二內無色想外諸色觀解脫內無
 色想者依無色定意解思惟故外者除眼等
 根意解思惟餘色故諸色觀者如前說三淨
 解脫身作證具足住解脫淨者一向意解思
 惟淨妙色為得增上安樂住故解脫者解脫
 淨不淨色功德障礙心故身者意身故作證
 者由智斷得作證故具足住者如前說無色
 諸解脫如前分別此中差別者為欲證得一
 切種身業自在故及為解脫彼障故復除先
 色作無邊虛空意解思惟故名第四無邊虛
 空處解脫為欲發起聖神通無諍願智無礙
 辯等諸功德故又為證得能助發起彼諸功
 德心自在故又為解脫彼障故復作無邊識
 意解思惟故名第五無邊識處解脫行者作
 如是發起功德方便已令第四靜慮起現在

前發諸功德爲欲證得最勝無漏住自在故
又爲解脫彼障故復作無所有意解思惟故
名第六無所有處解脫爲欲證得最第一有
住自在故又爲解脫彼障故復作非想非非
想意解思惟故名第七非想非非想處解脫
爲欲證得最勝寂靜住自在故又爲解脫彼
障故復從非想非非想處心進止出又息滅
攀緣故名第八想受滅解脫勝處者謂八勝
處廣說如經一內有色想外諸色觀少若好
若惡若劣若勝於彼諸色勝知勝見得如是
想名初勝處內有色想者如解脫中說外者
謂除眼等根顯餘色故諸色觀者如前說少
者謂資具攝色意解思惟故若好若惡者謂
淨不淨色之所攝色意解思惟故若劣若勝
者謂淨不淨聲香味觸之所攝色意解思惟

故於彼諸色勝者謂能治所治作意思惟障
礙功用所不惱故知者用奢摩他道見者用
毗鉢舍那道得如是想者謂於實勝中得實
勝無慢想故於不勝中得實不勝無慢想故
二內有色想外諸色觀多乃至名第二勝處
內無色想中觀少觀多二種亦爾內有色想
外諸色觀者如前說多者顯示有情世間器
世間色徧思惟故餘如前說五內無色想外
諸色觀青青顯青可見青光猶如烏莫迦華
或如婆羅痾斯染青衣色如是黃赤白色皆
應廣說此中差別者黃色如羯尼迦羅華或
如婆羅痾斯染黃衣色赤色如槃豆時縛迦
華或如婆羅痾斯染赤衣色白色如烏奢那
華或如婆羅痾斯鮮白衣色青者謂總句青
顯者謂俱生青青可見者謂和合成青青光

者謂彼二所出鮮淨光青如青色黃赤白色亦復如是廣說應知餘如前說於一處說二譬喻者此顯俱生和合二種色故此八勝處與修三種緣色解脫作所依止後四勝處意解思惟欲界天色及色界色又復應知是諸勝處爲治下地種子隨逐作意思惟非爲對治自地所治作意思惟徧處者謂十徧處廣說如經謂地徧處一能解了上下及傍無二無量如是水火風徧青黃赤白虛空識徧上下及傍無二無量地徧處者由色所依徧滿故彼能依色亦徧滿由彼增長故一能解了者謂能證此觀補特伽羅上下及傍者謂徧滿諸方及四維故無二者離餘諸界及不雜顯色徧滿故無量者無有分齊相徧滿故如地徧處餘水火風青黃赤白亦復如是如其

分四

五

所應虛空徧處者謂對治一切色相作意思惟徧滿故餘如前說識徧處者謂緣無量識作意思惟徧滿故餘如前說此中由三解脫故得勝色自在由得彼已方可說言勝色自在極成就故識處已上無有徧滿所緣無量形段依止分別遠離故應知勝處及與徧處是諸解脫能清淨道由諸勝處勝所緣故由諸徧處所緣徧故能令解脫清淨應知無諍者謂能守護他煩惱行之所引攝無癡智見性及彼相應等持諸心心法由此行多所行故無礙故妙願智者謂於三世及非世攝所知法中無餘如實了知之所引攝無癡智見性及彼相應等持諸心心法由此行多所行故無礙解者謂四無礙解廣說如經一法無礙解謂於一切種一切法差別名中如實覺悟之所

引攝無癡智見性及彼相應等持諸心心法
二義無礙解謂於一切種一切法種種相中
如實覺悟之所引攝無癡智見性餘如前說
三訓詞無礙解謂於一切種一切法訓釋詞
中如實覺悟之所引攝無癡智見性餘如前

說四辯才無礙解謂於一切種一切法通達
中如實覺悟之所引攝無癡智見性及彼相
應等持諸心心法由此行多所行故神通者
謂六神通如經廣說一神境智見作證通謂
爲示現一切種身業自在無癡智見性及彼
相應等持諸心心法由此行行多決定境界
故二天耳智見作證通謂爲隨聞一切種語
業無癡智見性餘如前說三心差別智見作
證通謂爲入一切種他心行無癡智見性餘
如前說四宿住隨念智見作證通謂爲入一

分四

六

切種前際趣行無癡智見性餘如前說五死
生智見作證通謂爲入一切種有情趣行無
癡智見性餘如前說六漏盡智見作證通謂
爲入出離一切煩惱及無餘苦無癡智見性
及彼相應等持諸心心法由此行行多決定
境界故復次頌曰

諸相好清淨 及諸力無畏 不護與念住
永斷諸習氣

論曰諸相者謂三十二大丈夫相廣說如經
一善安立足大丈夫相由如來菩提資糧善
圓滿故具足受持平等行故感得此相由此
相故有暫見者即信如來是大大丈夫足相足
標幟足形貌如善安立足相如是諸餘大大
夫相如其所應盡當知謂於手中應說手相
手標幟手形貌如是於頭頂等所餘支節各

隨其名應當廣說好者謂八十種好廣說如
經是諸好等若具足相攝如菩薩地中說若
隨衆生所宜隨勝相攝如大慧度經說若廣
分別諸好應知如廣分別相中說清淨者謂
四一切相清淨廣說如經一依止清淨謂由
如來證得一切相清淨智及一切相清淨斷
故於依止取住捨中究竟無上自在二境界
清淨謂由如來證得一切相清淨智及一切
相清淨斷故於一切事變化境界中究竟無
上自在三心清淨謂由如來證得一切相清
淨智及一切相清淨斷故於一切相世出世
善根增長心中究竟無上自在四智清淨謂
由如來證得一切相清淨智及一切相清淨
斷故於一切相所知中無著無礙智究竟無
上自在諸力者謂如來十力廣說如經一處

非處智力謂於一切相因果中能如實問說
無礙智性及彼相應等持諸心法二自業
智力謂於一切相各別處所相續所起業及
所得報中無礙智性餘如前說三靜慮解脫
三摩地三摩鉢底智力謂於攝受一切相世
間清淨功德方便中無礙智性餘如前說四
根上下智力謂於出世間功德所依一切相
所化有情根差別中無礙智性餘如前說五
種種勝解智力謂於一切相所化有情阿世
耶差別中無礙智性餘如前說六種種界智
力謂於一切相所化有情隨眠差別中無礙
智性餘如前說七徧趣行智力謂於一切相
乘出離差別中無礙智性餘如前說八宿住
隨念智力謂於一切相前際趣差別中無礙
智性餘如前說九死生智力謂於一切相後

際趣差別中無礙智性餘如前說十漏盡智力謂於一切相趣非趣出離方便差別中無礙智性及彼相應等持諸心心法又諸力中一切應說能如實問記無畏者謂四無畏廣說如經一佛作誠言我是正等覺者若有難言於是法中不正等覺我於此難正見無緣是故無畏謂如來證得妙善清淨一切種智故二佛作誠言我諸漏已盡若有難言如是如是諸漏未盡我於此難正見無緣是故無畏謂如來證得妙善清淨一切種斷故此二無畏依自利德三佛作誠言我為弟子說障礙法染必為障若有難言染習此法不能為障我於此難正見無緣是故無畏謂依如來為所化有情說一切種所對治法四佛作誠言我為弟子說出離道修定出離若有難言

雖修此道不能出離不正盡苦及證苦邊我於此難正見無緣是故無畏謂依如來為所化有情說一切種能對治法此二無畏依利他德不護者謂三不護廣說如經一如來現行身業妙善清淨無不清淨現行身業可須覆藏是故不護謂如來一切種一切時身業妙善清淨故為所化有情正說法時能以勝力折伏攝受一切徒眾如身業不護如是第二語業不護第三意業不護應知念住者謂三念住廣說如經此即攝受所化眾時於三種徒眾行差別中住最勝捨不愛不恚不染心性未斷諸習氣者謂諸如來出離無始無量無數大劫生死為證自性不隨轉故證得如來妙淨智斷復次頌曰
無忘失妙法 及如來大悲 佛不共德法

一切種妙智

論曰無忘失妙法者謂為證一切種一切所化有情一切所作事不過時故證得如來妙淨智斷及如來大悲者謂如來悲由四種因緣說名大悲一依止一切種妙善清淨轉依所作成故二長時修習所得故三妙善清淨智所引故四緣極深固種種堅牢一切相苦境界故佛不共德法者謂十八不共佛法廣說如經超過一切聲聞獨覺地故彼建立應知一如來無誤失業謂無不染汙誤犯失故二無卒暴音謂無不染汙高笑暴音故三無忘失念謂無不染汙久作久說不隨念故四無不定心謂於一切威儀行住等中作意等持恒隨轉故五無種種想於流轉寂滅中證得無分別無差別智故六無不擇已捨謂

究竟不捨有情事故七欲無退謂得所知障清淨故如欲無退如是八正勤無退九念無退十等持無退十一慧無退十二解脫解脫知見無退應知十三於過去世無著無礙智謂欲作意頃一切種知故如於過去如是十四於未來十五於現在無著無礙智應知十六如來一切身業智為導首隨智而行謂由智發起攝受於一切時善方便故如身業如是十七語業十八意業應知一切種妙智者謂證得如來最極清淨智斷故謂於染汙清淨二法一切種數相差別中無礙智性及彼相應等持諸心心法又復如來住無漏界為作一切有情所作事故於十方土示佛生有現身言說心有所行有所宣說成等正覺轉妙法輪入大寂滅無礙智性及彼相應等持

諸心心法是亦名為一切種妙智

又相好等諸佛功德為釋經義略已示現若

廣分別如菩薩地應知

如是已別說 九事總分別 今當說頌曰

當知前九事 初為二所依 次二後六種

攝雜染清淨 染依差別故 清淨所緣故

心不流散故 正修方便故 彼位差別故

言說等因故 彼果功德故 數次第唯爾

論曰前九事中初一切事為二所依一雜染

所依二清淨所依由次二事攝諸雜染一由

界事二由雜染事由後六事攝諸清淨一由

諦事二由依止事三由覺分事四由眾生事

五由果事六由功德事由二種事攝雜染中

雜染所依故雜染差別故由六種事攝清淨

中清淨境界故於境界中心不流散故由不

分四

十一

散亂於所緣境正方便故正方便者位差別

故及言說等因故正方便果故彼果功德故

此中位差別故言說等因故此二建立眾生

事應知言說等因故者為言說易故為隨順

世間故為避怖畏故為令信知自他功德過

惡成就故由是因緣此九種事數決定及次

第決定應知為欲思量如此九事復應廣說

頌曰

欲思量無量 諸問答差別 由諸佛語言

事與想攝故

論曰若欲思量如上九事無量問答差別者

由二種攝故應可思量一由一切佛語言事

攝故二由一切佛語言想攝故此中一切佛

語言事攝者謂由三種經應知一由增十經

二由廣義經三由集異門經一切佛語言想

攝者由四種 唵陀南伽他何者為四頌曰

句迷惑戲論 住真實淨妙 寂靜性道理

假施設現觀 方所位分別 作執持增減

闇語所覺上 遠離轉藏護 簡擇與現行

睡眠及相屬 諸相攝相應 說任持次第

所作境瑜伽 奢摩他與觀 諸作意教授

德菩提聖教

論曰句者所謂六處無量境界無量方所無

量時節復有三界一欲界二色界三無色界

復有三界一小千世界二千世界三大千

世界復有四輩一在家輩二出家輩三邬波

索迦輩四非人輩復有三受謂苦受樂受不

苦不樂受復有三世謂過去世未來世現在

世復有三寶謂佛寶法寶僧寶復有三法謂

善法不善法無記法復有三種雜染謂煩惱

分四

十二

雜染業雜染生雜染復有四聖諦謂苦集滅
道復有九次第定謂初靜慮乃至滅受想定
復有三十七菩提分法謂念住正斷神足根
力覺支道支復有四種沙門果謂預流果一
來果不還果最勝阿羅漢果復有衆多最勝
功德謂無量解脫勝處徧處無諍願智無礙
辯六神通等復依廣乘有五種事一相二名
三分別四真如五正智復有二種空性一衆
生空性二法空性復有二種無我性一衆生
無我性二法無我性復有遠離二邊處中之
行謂遠離增益邊及損減邊復有四種真實
一世間所成二道理所成三煩惱障淨智所
行處四所知障淨智所行處復有四種尋思
謂名尋思事尋思自性假立尋思差別假立
尋思復有四種如實徧智謂名尋思所引如

實徧智事尋思所引如實徧智自性假立尋思所引如實徧智差別假立尋思所引如實徧智復有三種自性一徧計所執自性二依他起自性三圓成實自性復有三種無自性性一相無自性性二生無自性性三勝義無自性性復有五相大菩提謂自性故功用故方便故轉故還故復有五種大乘一種子二趣入三次第四正轉五正轉果謂最初發心故於諸有情起大悲故波羅蜜多故攝事故自他相續成熟故復有五無量想一有情界無量想二世界無量想三法界無量想四所調伏界無量想五所調伏方便界無量想復有真實義隨至謂於一切無量法中隨至真如及此中智復有不思議威德信解復有無障礙智復有三十二大丈夫相及八十種隨

形好復有四種一切相清淨十力四無所畏三念住三不護大悲無忘失法永斷習氣一切種妙智如上所說略唯二種一聲聞乘中所釋句二大乘中所釋句迷惑者謂四顛倒一於無常中計常顛倒二於苦中計樂顛倒三於不淨中計淨顛倒四於無我中計我顛倒戲論者謂諸煩惱及雜煩惱諸蘊住者謂四識住及七識住真實者謂真如及四聖諦淨者謂三種淨性一自體淨性二境界淨性三階位淨性妙者所謂三寶處勝建立故名爲妙寂靜者謂自善法欲乃至一切菩提分法及所證果皆名寂靜性者謂諸法相若自相若共相若假立相若因相若果相總名爲性道理者謂諸緣起及四道理假施設者謂唯於法假立衆生及唯於相假立諸法現觀

者謂六種現觀如成現觀品當說方所者所謂色蘊位者所謂受蘊分別者所謂想蘊作者謂諸行蘊執持者所謂識蘊增者此有二種應知一煩惱增二業增如增減亦二種謂煩惱減業減闇者謂無明疑語者謂十二分語趣說名為語分四所覺者謂種種所說法義名為所覺上者謂沙門果遠離者謂五種遠離一惡行遠離二婬欲遠離三眾具遠離四聚會遠離五煩惱遠離轉者所謂三界及與五趣藏護者所謂戀過去希未來著現在簡擇者所謂一行順前句順後句四句無事句色法非色法有見無見有對無對有漏無漏有為無為有諍無諍有味著無味著依耽嗜依出離世間出世間攝屬不攝屬內外麤細勝劣遠近有所緣無所緣相應不相應有行無

行有所依無所依因非因果非果異熟非異熟有因無因有果無果有異熟無異熟有執受無執受四大種造非四大種造同分彼同分有上無上過去未來現在善不善無記欲繫色繫無色繫學無學非學非無學見斷修斷無斷復有四緣一因緣二等無間緣三所緣緣四增上緣復有四依一依法不依眾生二依義不依文三依了義經不依不了義經四依智不依識復有四無量四念住四正斷四神足五根五力七徧覺支八聖道支四種行四法迹奢摩他毗鉢舍那增上戒增上心增上慧解脫勝處徧處等現行者謂煩惱纏隨眠者謂煩惱隨眠相屬者所謂六處同一依止相屬應知復有諸法能引攝法彼亦展轉相屬應知復有諸根境界能取所取相屬

應知諸相攝者有十一種相攝一更互攝二
 界攝三相攝四種類攝五分位攝六不相離
 攝七時攝八方攝九一分攝十全分攝十一
 勝義攝相應者所謂五種應知一與他性相
 應非自性二於他性相應中與不相違法相
 應非相違法三於不相違相應中下中上品
 相似相應非不相似四於下中上品相似相
 應中同時相應非不同時五於同時相應中
 同地相應非不同地說者所謂四種言說一
 見言說二聞言說三覺言說四知言說任持
 者所謂四種食一段食二觸食三意思食四
 識食次第者所謂五種次第一流轉次第二
 成所作次第三說次第四生次第五現觀次
 第所作者謂八種所作一依止滅二依止轉
 三徧知所緣四喜樂所緣五得果六離欲七

轉根八發起神通境者謂四種所緣一徧所
 緣二令行淨所緣三善巧所緣四令煩惱淨
 所緣瑜伽者此或四種或九種四種者一信
 二欲三正勤四方便九種者一世間道二出
 世間道三方便道四無間道五解脫道六昇
 進道七下品道八中品道九上品道奢摩他
 者謂九種心住觀者謂三種事觀或四種觀
 或六事差別所緣觀應知三事觀者一有相
 觀二尋求觀三審察觀四種者一簡擇諸法
 觀二極簡擇諸法觀三徧籌量觀四徧審察
 觀六事差別所緣觀者一義所緣觀二事所
 緣觀三相所緣觀四分所緣觀五時所緣觀
 六道理所緣觀諸作意者謂七種作意一了
 相作意二勝解作意三遠離作意四攝樂作
 意五觀察作意六方便究竟作意七方便究

竟果作意教授者謂五種教授一教教授二
證教授三隨次教授四不顛倒教授五神變
教授德者謂如前所說無量解脫等諸功德
法菩提者謂三種菩提一聲聞菩提二獨覺
菩提三無上正等菩提聖教者謂授歸依制

立學處施設聽者建立師資施論戒論生天
之論訶欲愛味示欲過失顯說雜染及清淨
法教導出離稱讚功德廣說一切清淨分法
復次頌曰

若欲正修行 徧知等功德 由十種法行
及六種理趣

論曰若諸行者於前九事欲正修行徧知求
斷作證修集諸功德等由十法行及六理趣
應當修學十種法行已如前說六種理趣者
一真義理趣二證得理趣三教導理趣四離

分四

十七

二邊理趣五不思議理趣六意樂理趣

顯揚聖教論卷第四

音釋

串 古患切 疍 女點切 慄 慄早邊切 卒暴 卒暴倉遠貌
沒切 暴 蒲報切 耽嗜 耽都舍切 樂也 卒暴倉遠貌